

ORATIO IMPERATA PARA HIN KALINAW

O Dyos, amon langitnon nga Amay,
Ginoo han kalinaw ug katadungan,
mapainubsanon nga nadangup kami ha imo
yana nga panahon han pagtikakusog han pagkabirubingkil
han mga nasud ha amon dapit dinhi ha kalibutan.

Ha naglabay nga katuigan,
ginparig-on nimo an amon pagtoo ha imo.
Tungod ha imo Dyosnon nga Panimangno
nahigawas kami ha damo nga kataragman,
natural man o kanan tawo tinuyuan,
nga dida han kaagi han amon bungto amon gin-atubang.
Gawsa kami ha makangingirhat nga girra.
Pamatii an mga pangamuyo namon nga nangangaraba ha imo.
Kalooye kami, Ginoo;
talwasa kami ha mga magdarahug nga kagamhanan
nga naghuhugay han mga punoan han kanasuran.
Kay natuod kami nga "... nakikigaway kami diri supak hin mga tawo,
kundi supak han magraot nga espirituhanon nga mga kagamhanan ha kalangitan"
(Efe 6:12)

Gin-aampo namon an mga punoan
nga gintubyanan hin mahinungdanon nga desisyon
tungod han amon nasud.
Ha imo aada an paglaum namon
nga nangangaro han imo pasaylo ug kalooy
ha mga takna nga an amon mga kahadlok ug mga pagduda
nakadum-it han amon pagkilala han amon igkasi
tungod hin nakiling ug diri matadong nga paghusga han tawo.

Hugot nga nag-aampo kami Ginoo,
nga imo "kami himuon nga instrumento han imo kalinaw.
Kon aada an kasina, dad-on namon an gugma.
Kon aada an kasamok, pagpasaylo.
Kon aada an pagduda, pagtoo.
Kon aada an pagturaw, paglaum.
Kon aada an kasisidman, kapawa.
Kon aada an kasubo, kalipay."

Pinangangaro namon ini
pinaagi han amon Ginoo Jesucristo, imo Anak,
nga upod ha Imo ug han Espiritu Santo buhi ug naghahadi,
Dyos ha dayon nga katuigan.
Amen.

Birhen Maria, Rayna han Kalinaw, ig-ampo mo kami.
San Miguel Arkanghel, ig-ampo mo kami.
San Jose, ig-ampo mo kami.
San Francisco de Asis, ig-ampo mo kami.
San Lorenzo Ruiz, ig-ampo mo kami.
San Pedro Calungsod, ig-ampo mo kami.
(Patrono/a han Diyosesis), ig-ampo kami.